

## OWEN (TEULU), Peniarth, plwyf Llanegryn, Meirionnydd.

Fel y gwelir yn yr erthygl ar deulu [Wynne](#), Peniarth, daeth y stad i eiddo'r Wyniaid trwy briodas (1771) [WILLIAM WYNNE](#), Wern, plwyf Penmorfa, Sir Gaernarfon, a JANE, arglwyddes-waddolog Bulkeley, merch hynaf ac aeres Lewis Owen, Peniarth. Rhoddir manylion am y teulu a oedd yn byw yn Peniarth cyn y briodas hon (a) gan [W. W. E. Wynne](#) yn ei nodiadau yn [E. Breese](#), *Kalendars of Gwynedd*, a [S. R. Meyrick](#), *Heraldic Visitations*, a (b) yn [J. E. Griffith](#), *Pedigrees*, 323. Braslun yn unig a roir yma. Hawliai'r teulu ddisgyn o Ednowain ap Bradwen. Ceir LLEWELYN a dalodd warogaeth am ei diroedd i'r brenin Edward I. Mab i Lewelyn oedd EDNYFED, a briododd Gwenllian, merch a chydaeres Gruffydd ab Adda ap Gruffydd, Dôl Goch, rhaglod cwmwd Ystumamer am beth amser yn ystod amser Edward III - ceir beddrod Gruffydd ab Adda yn eglwys Tywyn. Aer y briodas hon oedd ARON AB EDNYFED a ddilynwyd gan EDNYFED, hwnnw gan ei fab GRUFFYDD, a hwnnw gan RHYS AP GRUFFYDD, g r y gwnaethpwyd ei ewyllys yn 1476. Mab i Rys ap Gruffydd oedd JOHN AP RHYS a briododd Angharad, merch [Dafydd ap Meurig Fychan](#), Nannau. Aer John ap Rhys ac Angharad oedd WILLIAM, a oedd yn fyw yn 1566, ac a briododd Elizabeth, merch [Howel ap Jenkin ab Iorwerth](#), Ynysmaengwyn, hen gartref Cymreig arall tua thair milltir i lawr o Beniarth yng nghyfeiriad Tywyn. Adnabyddid aer y briodas honno fel DAVID LLOYD (y mae ei ewyllys wedi ei dyddio 11 Gorffennaf 1570). Priododd David Lloyd Nest (neu Annes), merch [Gruffydd ap John ap Gruffydd](#), Cefnamwlch, Sir Gaernarfon, eithr gan na bu iddo aer fe'i dilynwyd gan ei chwaer ELIZABETH, gwraig GRUFFYDD OWEN, Talybont, Llanegryn, 4ydd mab y '[barwn](#)' [Lewis Owen](#), Dolgellau. Aer y briodas hon oedd LEWIS OWEN I (bu farw 1633), a adawodd ddwy ferch - (1) MARGARET (bu farw 4 Hydref 1667), yr aeres, a (2) Susan, a gafodd Bronyclydwr, ac a ddaeth yn fam i [Hugh Owen](#). Trwy ei g r cyntaf, Richard Owen, Morben, Machynlleth, daeth Margaret yn fam i LEWIS OWEN II (1625 - 1691), siryf Meirionnydd, 1646-7, ac aelod seneddol y sir (etholwyd 1659). Aer Lewis Owen II drwy ei wraig, Jane, merch [Syr Richard Lloyd](#), Esclusham a Dulasau, oedd RICHARD OWEN I (bu farw 1714), siryf Sir Drefaldwyn, 1694, Meirionnydd, 1695, a Sir Gaernarfon, 1705. Dilynwyd ef a'i wraig Elizabeth (merch ac aeres Humphrey Pughe, Aberffrydian) gan eu mab, LEWIS OWEN III (bu farw 1729), siryf Meirionnydd 1714, Sir Gaernarfon, 1715, a 'Custos Rotulorum' Sir Feirionnydd, 1722-8. Ei wraig ef oedd Margaret merch Syr William Williams, ail farwnig, Llanforda (mab y '[Llefarydd](#)' [Williams](#)), a chawsant RICHARD OWEN II, a fu farw pan nad oedd ond 13 oed. Chwaer Richard Owen II oedd JANE, arglwyddes-waddolog Bulkeley (bu farw 1765), yr aeres bellach, a briododd, yn ail r, Edward Williams (bu farw 1762), mab [John Williams](#), Bodelwyddan. O'r briodas honno bu tair merch: (1) JANE (bu farw 1811), (2) Elizabeth, a (3) Margaret. Y gyntaf o'r tair, sef Jane, oedd yr aeres, a hyhi a briododd [WILLIAM WYNNE](#), Wern Sir Gaernarfon, yn 1771. Am y Wyniaid a ddilynodd [William Wynne](#) ym Mheniarth gweler yr erthygl ar deulu [Wynne](#), Peniarth.

Gweler hefyd yr erthyglau ar [John Owen](#) (1616 - 1683), deon Christ Church, nai Lewis Owen I, a [Lewis Owen](#) (y '[barwn](#)' Owen).

### Awdur

Syr William Llewelyn Davies, (1887 - 1952)

### Ffynonellau

Enwyd y prif ffynonellau yng nghorff yr erthygl gweler hefyd *NLW MS 4965*

### Dolenni Ychwanegol

Wikidata: [Q20734034](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC-RUU/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.